


Awor numa pueblo ta realizando e seriedad di medidanan nobo

ORANJESTAD (AAN): Gasolin ta subiendo Diadomingo awor cu 10 cent pa liter! E ta un aumento barbaro, considerando cu awor ta cobra BBO, BAZV, y BAVP riba dje. E anuncio aki a crea hopi reaccion Diabierna atardi.

Un observador politico a mostra na DIARIO, cu loke ta pasando awor 1 di Juli, ta bira un 'shock' fuerte contra e solidez di Gobierno di coalicion MEP-POR-RED.

Specialmente e anuncio cu lo obliga tur ciudada-



Ciudadanonan cu ta pagando Serlimar di basta tempo caba, ta reclamando cu nan mes cu ta pagando, ta haya servicio malisimo asina. Trahadornan di Serlimar no ta pone bakinan bek na nan lugar, of ta hasta kibra baki y djis lage benta asina dilanti bo cas.

no pa paga pa servicio di Serlimar, a corona e obra. Voznan di protesta por a wordo scucha tur caminda riba Diabierna. Y esaki a empeora ora cu a bira conoci cu gasolin tambe lo subi cu 10 cent entrante Diadomingo madruga. Ni papia mes di e prijs di pan, cu lo conoce un aumento grandi riba Diadomingo awor.

Esaki hunto cu e relato cu Banconan lo bay cobra pa cada transaccion, y cu di awor en adelante e formula di paga credit card via \$1 = AWG 1,8234 lo pertenece na pasado. Awor pa cumpra Dollars of paga credit card, e lo bay ta mas cu \$1 = Afl. 2,00.

Un persona a puntra, si acaso Dialuna awor ora e bay cambia 50 Florin na banco pa haya 50 Florin los na moneda, si acaso e tin di paga e 6% pa e transaccion ey.

Gobierno a purba di pusha tur e culpa riba decisionnan descabeya di Gobierno di AVP ultimo 8 añanan.

Pero un Gobierno dinamico, semper por busca forma pa genera entrada extra sin cu nan tin di resorta na djis hisa prijs di belasting, prijs di servicio, y demas tarifa. Un gobernante mester ta ingenioso

pa sa kico otro por haci pa yena tesoreria di Gobierno. Y no djis pensa mesora con pa saca placa di cartera di pueblo, y haci bo ciudadanonan mas pober aun.

E informe cu algun habitante lo bay paga te maximo di 90 Florin pa luna pa recoge sushi via Serlimar (hasta si bo ta usando servicio di EcoTech), a pone fuse di hopi hende bula. Pasobra hopi ta esnan cu ya caba ta pagando pa servicio di Serlimar, pero nan ta haya nan toter di baki di sushi tur kibra, mal benta

mey-mey di caminda, y ora bo yama pa reclama cu e trahadornan di Truck di Sushi a kibra e baki, nan no ta ni yega bo cas pa dunabo un nobo.

E nivel di disgusto den pueblo no tey djis cerca e ciudadanonan... sino hasta cerca varios persona cu den decada di 1970 y comienzo di 1980 tabata fiel sostenedor di Betico Croes. Nan mes tambe a duna indicacion di no ta di acuerdo cu e medidanan aki cu ta sutando pueblo. Aunke nan no kier bin dilanti ainda pa expresa nan disgusto, tog nan tin deseo pa MEP bay bek na e sistema di antes, unda Betico Croes tabata stima su pueblo masha hopi mes.

Con disgusta pueblo ta? E observador politico a mostra cu si acaso e weekend aki tabatin Eleccion di Staten, e partidonan den coalicion lo haya un golpi fuerte! Apenas 9 luna despues di eleccion di September 2018, nan ta crea un aftershock asina mahos y laga pueblo su cartera bashi.